

SAVOGNIN: Canorta Tgimirola

Ins fiss sez gugent puspe unfant

comm./pi. Ossa dastgan igls unfants dalla Canorta Tgimirola sa legrar sur d'en'atgna piazza da giuier. Surtot graztga agl angaschamaint digl Lions Club Savognin/Surses, cun sustign dalla Uffer SA e digl anteriori cumegn Savognin. Igls «liuns» on finanztgia e construia la tor da giuier.

Siva digl matg 2015 è la Canorta Tgimirola averta per unfants a parteir da treis onns anfignen tar la vigliadeta da scoligna.

Er la grappa da giuier «Artgantschiel» è activa mintgamai la mesemda avant mezde ainten chellas localitads.

Ena tor da belleza

«Siva digl amprem taimp dalla fasa da scumanzamaint e digl indrezzamaint digl interiori digls salvs, vainsa già igl giaveisch da stgaffeir sen la stad proxima er ena piazza da giuier conforma agls basigns digls unfants. Anfignen ossa eran cò plazs da parcar. Nous levan pero en spazi d'antrada an tgesa, tgi dat en bung sentimaint agls unfants. Els duessan er saveir giuier e far tarmagls sainza disturbis oravant», dei Monika Battaglia, commembra da suprastanza dalla canorta.

Dalunga è sto cler, tgi duess dar en'antrada cun piazza da giuier. Ossa è anc già da neir scalaria la finanzaziun da chel project. Canortas èn per regla betg retgas ed ellas èn ranvieidas agl sustign da sponsours per da chellas tgossas da chella grondezza. La Canorta Tgimirola è pero catto chel ageid tar igl Lions Club Savognin/



Igls unfants on grond plascheir dalla nova purscheida per far tarmagls.

Surses. Ena grappa da commembres ò realiso an curt taimp chel project.

An en hui è tot sto a post

Dus sondas èn igls representants digl Lions Club sa scuntros segl post da biagier ed on construia la tor da giuier. Igls 13 d'avost 2016 era tot pront. Dasper ena bela tgesigna, dispona la tor er da balasouas, ena ruschnera, scu er d'ena sablunera cuverta. Ossa dastgan igls unfants dalla Canorta Tgimirola e dalla grappa da giuier «Artgantschiel» far da gost tarmagls e sa divertir sen la nova piazza da giuier.

Er per las tgirunzas è chella piazza da giuier ena grond avvantatg. Uscheia son igls unfants er chi e lò sa divertir all'aria frestga, sainza stueir eir lungas tiradas a spass, cura tgi mangia igl taimp persiva.

Activitads dalla Canorta Tgimirola

Tgira d'ufants mintgamai digl glindesde anfingen igl venderde, cun excepciu dalla mesemda.

Mesemda avant mezde mintgamai grappa da giuier «Artgantschiel».

www.laibella.ch



Igls commembres digl Lions Club, tgi on construia la tgesa e la ruschnera per la canorta.



La ruschnera è en urdegn da giuier tgi tot igls unfants on fitgugent.